

## Ène hichtoire de tchie nôs...

poi ç'te Marion Matthey, l' premie de djuin 2012

Dains ci temps-li è n' y aivait p' de moûetuâs pompes c'ment qu' adjd'heû. Ç' ât le m'nugie qu' faibriquait lai biere. Tchie nôs, ç' ât l' Picus que yivrait çoli dains lai faimille di moûe.

În djoué, èl é botè ène biere chus son p'tét fouérgon pe èl ât paitchi po Sint.Brais.

En péssaint d'vaint lai Coranne, èl é reincontrè l' Keller, ç' ât în véye boûebe qu' était maignîn. Ç'tu-ci y' é d'maindè d' rentraie d'aivô lu po traîre les vaitches : « Ç' ât l' heure, te vois ! » qu' è y' é dit.

« Monte d'rie, li-d'tchus, è y é d' lai piaice ! »

Les voili paitchi. În pô aiprés Montfâcon, è y aivait în boûebe chus l' baid d' lai vie, daivô son vélo. L' aipprenti qu' aiccompaignait l' Picus dié : « Aïrrâte, ç' ât ci Pascal di Djosé ! »

« Qu' ât-ç' qu' è y é, p'tét ? »

« Mon p'neu ât crevè pe d'aivô lai pieudge, ç' n' ât p' în temps po r'virie è pie ! »

« È y é encoé d' lai piaice chus l' ponty, è t' y fât montaie. »

È Sint-Brais, tot l' monde déchend, mains nian, pe tot l' monde ; è n' y é pus qu' în hanne chus l' ponty.

« Mains, laivoû ç' qu' èl ât le p'tét ? »

« Tiu, le p'tét ? I n' aî ran vu ! » qu' dit l' Keller.

« Sacoeurdie, èl ât tchoi qu' i m' muse ; nôs v'lans allaie vouere. »

D'mé toué... aiprés cîntçhe minutes, le v'li ! Èl ât dains l' crâtat, tot mô, tot crattou, tot roudge de saing è pe tot r'trémolè.

« Mains, qu' ât-ç' que t' és fait, t' és tchoi d' lai dyimbarde ? »

« Ô, i aî t' aivu lai pavou d' mai vie ; l' moûe d' lai boête, è n' ât p' moûe ; i l' aî vu rem'vaie, ô là là ! ç'te pavou ! »

« Bogre de fô ! qu' dié l' Keller, i m' seus botè dains lai boête tiaind qu' lai pieudge ât v'ni ; è pe, po saivoi ch' èlle aivait râte, i aî soûetchi lai main ! Ç' ât moi qu' étôs li-d'dains ! »